

湘綺樓全集

湘綺樓詩第七卷

乙丑至庚午春

湘潭王闓運字壬父著

北嶽篇

幽并實荒敞靈嶽肆蟠崇橫地居冥漠負天起中峰穆
穆萬障間端肅見此容大野氣涼曠靜慮填虛空心魂
接靈光瞻禮識所宗周覽倒馬西側眺飛狐宮環帶極
千里分威蔭封龍堯德昔隆昌踐冀撫華戎近圻歸冬
狩蓋號識成功惟聖克配物非神豈登封逮移曲陽祀
始恨周行窮朔漠驕駝羊恒衛號霜風神嶽不改度傲
兀燕晉中天泉浪徒涌慶忌游榛莽冰雪封其顛螭豹

詩集卷七

專此雄徑路旣已絕良時復難逢悵望無人鄉欲去心
忡忡神感豈不達真形若昭矇世人未始聞作歌告其
蹤寶符何足探喬墮美周容無爲誣皇典貽哂恒陽松
飲安陽酒樓作

輕車翼還風春塵翳飛蓋平沙盡野勢通衢貫邑內軒
軒五樓亭俯見鄴郡大左漳右河間壯傑一都會登覽
懷昔游命酒獨慷慨北望浮雲陰朔塗久荒蕨貧弱積
晏安燕趙遂凋瘵王風鞠茂艸神教已百代漢業誰再
興魏公實雄邁曠然開崇宇霸功猶可賴土風非不淑
微管竟終廢棗莢依王澤苞莢在所漑艱危自古然誰

謂值天壤愧無匡時畧且酌亦且喟豈敢陋微軀投老
息林瀨

南歸過汝墳作贈妻詩一首

游客懷春歸春盡游亦倦新燕如故人差池始相見朝
登大防陞風塵散四遠蒙沙暗碧樹近水明芳甸荊豫
氣始交清和景猶絢南州昔富饒被澤乃豐宴詩人感
伐栢尙懼王室譴余非從政才散勞淑婦勸驅車豈顧
息瞻德甯無戀繫阿從此辭獨往淚如霰

臨洛歌示侍人莫六雲

臨洛南望春還早試下青驄踏茸艸歸心正喜見芳菲

隱性真如到林沼孤行漸遠偶淒然復值窮郊生野煙
古堠離離黑當路平沙漠漠白黏天尋常關河慣辛苦
佩劍橫腰作龍舞如何對此心神驚自有征行無此情
身如孤鴻來復去愁似歸雲縱復橫願關欲傾勢轉急
午日陰凝城未岷雀踏牆腰壤土岵犬銜馬骨寒溪澀
此地從來連趙都叢臺歌舞久荒蕪誰知明月照清瑟
但見垂楊嘯夾烏閨中不省行路難學成琵琶塞外彈
他時寢著邯鄲道恐懼嬌嘯破玉顏

題扇詩

并序

扇之爲用舊矣自斑氏有棄捐絕恩之歎世人稍喜

留藏多求題寫珍之錦襲以充佳玩常有數百年前
之製然皆紉素金象貴重以爲飾名士書畫筆迹以
爲重前朝多尙摺疊尤易收奔至於謝安所握羲之
所題以其蒲葵終無存者然則婕妤所歎亦以紉素
而後在篋乎夫物之適時者其爲用廣則其質不美
得之也易而棄之若忘有見珍重者必其間置者也
是以麒麟無服箱之功芝蘭無充口之味若以篋笥
爲無恩則蒲葵其永恨矣雖曰微物可以喻人故忠
臣遇主而糜軀烈士徇名而致命自期芳於千代終
同盡於微塵況復老驥在廐必有媿於青芻班女白

頭豈無慚於金屋成功代謝庸有吝歟余性不握扇
嫌其妨手惟對賓客時一持之頗有當世精扇常委
笥中每出游遠方多歷歲月適當須扇之時又隨購
焉而世俗初夏不用蒲葵頃以四月南歸至樊城而
亢熱市中求買乃無精製因憶去歲於韶州亦買一
麕絹團扇若今宦游人士未能堪持也且時當乏材
則庸夫充位士不自薦則太璞歸眞旣感佳者之委
間又傷用者之不見珍遂作詩題於上云

大隄春盡鷺花老歸轡重經漢陰道征戰塵荒估客稀
歌詞枉說襄陽好南風吹麥煖氣蒸紈素未裁愁暑增

聊從小市買筠骨粗疏正憶韶州繒從來物用始矜貴
誰道過時仍棄置萬物無心隨愛憎空將冰炭傷君意
蘇杭細絲京都工世人爭買誇玲瓏甯知輕盈滿懷月
不及蒲葵大扇風湘江藏扇年年怨篋笥棄捐華落賤
猶經芳袖時卷舒應勝塵沙逐流轉沈吟物理各推移
自謂繡華全盛時一朝用舍不相讓多謝秋風班女詞

湘妃廟

帝子出九江靈風澹容與玉顏比瑤華千載豈能故便
娟憶南國山館儼神御芷蘋懷芳馨波濤壯空霧龍耕
偶夷猶烟樹碧已莫聖仙久忘情侍輦惜茲路眷然浮

雲外清淚潤朝露中宵響靈瑟揮手何怨慕顧眄遺光
景飄颻動天步旅臣彤墀下擷茗獨延佇思欲貽下女
但懼非款素神想存舊宮終焉儻迴顧何所無芳蘭伊
古乃榮遇

君山

山色無遠近明秀湖天中方嶼浮片玉扁舟拂神風挂
席六來過清境未易逢歸塵旣已滌始得闢靈宮登陟
未覺高四望豁心容驚濤洶茫茫光映化冲融珍木不
知名芳碧自成叢北壑情所止漁樵事已同幽敞兼二
奇雲水盡玲瓏平生曠歷覽神逸獲更豐當願長來此

移石對喬松

丙寅人日因檄帙見高大心夔庚申人日見寄詩憶舊
游作示知者

昔尋風雲游上京當前顧眄皆豪英五侯七貴遍相識
行歌燕市心縱橫九江狂生高伯足平生見人但張目
單衫側帽臨春風二十紅顏美如玉行年相校一歲彊
俱騁逸足馳康莊曹劉阮陸不並世文歌琴酒爭軒昂
公車召試等一擲未抵臯盧要先得高車謬寫夷吾書
余試禮部賦得高車高大卷濃塗保和策高兩應殿試
均誤以爲管子書事也
四等尚書協辦大學
士肅順賜第在肩
子湖花羅瑜醉翻酒盞相歡

呼盛胡

盛主事康

俳優喧坐隅徐郎

徐編修昌緒

屈軼請爲奴就

中龍黃較清穩

龍編修湛霖黃學正錫燾

當筵未肯汚茵裾尹劉高

名

尹御史耕雲劉司業熙載

頗相怪王門長裾事權貴翩然黃鶴歸

青冥重來已見山河改我隨亞相

協辦曾侯國藩

困祁門君留

朱邸謀東巡清晨夷歌滿都市一炬便燼澄懷園

嗣皇中興覽堯典手詔畢邵誅共鯀李斯五刑不足惜

彭主纓首誰相問當時意氣論交人顧我曾爲丞相賓

俄羅酒味猶在口幾回夢哭春花新君歸湖口波浪惡

屢干相侯只蕭索同時得路俱騰驤往日庸奴又高爵

蜀中二李

李都轉榕李程儲鴻裔

滇二劉

劉知府樹堂知縣樹義

各懷銀印

踞方州郭卿少年攤八騶

郭巡撫
嵩燾

張蔡已覺曹郎羞

張員

外世準蔡

龍兄兄弟亦豪悻

龍知縣
汝霖

高平甘棠春蔽芾

黃許同稱太史官

黃錫彤許振
禕兩編修

潘祖蔭

潘副都
長都統
長善入坐

儼相對世人見我空逡巡如君登第亦輪屯惟餘莫

人友鄧鄧巡道

守書史散作東西南北人前歲娛園訪

秋竹招邀太守

王知府
必達

同明燭東湖夜水空如煙相思

桂樹年年綠杯酒白刃心膽麤別君豪氣未敢除人生

少年苦作健別時白面今有須獨行昂藏久無趣西游

華山不得去南隴五嶺東渡淮去年更折恒山樹倦游

謝病從文君移家承水學隱淪知君一事苦相羨新得

西施能負薪早春人曰桃破萼花下見君人曰作七年
歡笑猶眼前世上紛紛有哀樂南方花早東風顛憶君

攜手靈臺前馬纓紅拂綠絨席牡丹香醉金枕船東城

西館不復夢

東城內寓宅有馬纓丁香雜樹試禮部時假館也山西會館在海沱貢士覆試因譚

御史鍾麟借馬

圓明宮柳生荒煙四春老瘦泣珠箔昭陽月冷

人淒漣長隄珂轡往來路誰信於今走狐兔滄江寂寂
臥對春與君不得傷心語廬山雲連南嶽峰名山萬里
精靈通休言沈薶兩龍劍猶能吐氣作長虹

邯鄲才人嫁爲廝養卒婦

風月暗相疑容華坐見欺那知羅薦軟惟怪錦鞋遲餘

嬌分不逞暫死妾難爲朝朝與莫莫轉恨不相離
絳帙從金鞍房中欲語難惟堪論棧豆曾未識鳴環歌
舞空勞學鉛黃無處看長持謝張耳或恐遇任安
從來可奈何才貌枉人多琤琤玉可碎昏昏鏡不磨間
時強笑語積久慣差池清瑟夜猶響叢臺無路過

忝上春望

和春被芳皋朝雨溼鮮林昨游復幾日徑路杳幽森間
居易遺物感望茲川潯新茗四晷暖淑氣交余心碧草
去千里我思一何沈清烝不盈匹九折有餘深美人棄
我久江海其淫淫徙倚青楓樹獨返衡門陰

詩集卷七

寄題吳先生敏樹北莊詩

間居異沈隱夷險各有造卜築不期遠自得湖山奧
竭來孫塢行窈窕巴陵囿望廬識所欽果對靜者貌
夜軒星河清尊酒初月曜微言續禮樂好學豈云旄
向生識損益孝若昌典誥婚嫁願易終兄弟念所勞
道貧兩無慕出處各不繞紅顏倚玉杖素琴送金爵
倦客慕林藪壯氣論海嶠麥秀復再薪凱風棘仍搖
從游不可期深入亦獨到近聽承口鼓永罷激中權
蹇英挹石泉所願日幽篠何以贈明德千里匪孤蹈

贈馮氏姨子詩一篇

穆穆凱風華木繁榮剛柔分質託性同生原隰畛畛有
實其英枝葉勿剪可以喻情 咨余孤幼母慈實顧
勉慈母丁彼終窶縕褐是溫藜莧是哺雖有周親鮮克
自度 嗟矣外氏來自東吳朱紱旣輝遂隕其閭苗裔
弗秀延及姊姑相彼馮王三姓同枯 煢煢從母亦遭
不淑播于春陵甘此貧毒同生分離限彼川陸塵起
颺逝邈然俱覆 粵余閔凶慘痛焉加叔舅奄奄又喪我
廬爾猶偏蔭扶持皤皤昔懼不育今也丈夫 爾母耆
耄外家之壽啜菽愉愉惟貧能久賢不憂養豈必致酒
寒泉永嘆我獨無祐 惟我與尔素純當門基不易立

業亦難新六職攸殊道在守真言不可僞志不可紛
翩彼雙鸞各集琅玕覆此雛童振其羽翰爰居知風九
鼎勿歡疇是松栢而畏歲寒道習有常人惡自異承
是儀訓以甯爾志榮辱是其能不爾冀瞻仰遺恩以睦
姻懿

嚴公孫曰本刀歌

余友嚴咸嘗視余古刀云其祖平寇漢中所常佩也
咸素有縱橫之志尤愛此刀命余作詩同治四年春
咸從浙軍歸不得意發疾而死余與咸誼同存亡而
獨見其天越十有八月乃爲此篇悼之

故人贈我松石篇兼示日本刀詩成明珠照神骨刀如
秋泉割雲窟云此神鋒浮海來先公佩之平三槐雖梁
百年洗戰血東南再亂如奔雷龍螭乘時能屈伸誓將
提挈靜邊塵悲風夜卷北山雪晴日朝分西海雲不須
剗割試銛利一條寒光生壯氣白霜瑩透秋鷹棱青電
平磨老蛟背本知神物不妄傷奇氣驚人人走藏空堂
廣坐起瞿刺世間不敢看鋒銳冰文霜華仍寸裂出匣
入匣經年月大冶鑄成皆不祥百鍊純剛終自折長虹
耿耿北斗搖兒童魑魅皆寒毛休辭棄置比凡鐵爲應
留用與鉛刀

詩集卷七

郭嵩燾劉蓉兩巡撫先後罷歸贈詩一首

華櫨枉長材雲逵接傾軌徒然損高節未足榮一日時
危易特達難紆銷積毀之子固連城雙旌翩鵲起憂深
季文食謗滿樂羊紙捐印反見嬰登壇卒相抵入門慚
松桂云別未逾紀淹留竟何成康濟俱未擬出處固多
涂竭來在俄爾門閭宛舊色鼓角疑過耳釋累猶超然
攀纏得無悔伊余識寵辱放迹巖壑裏穫稻聊紀年種
松詎盈咫依依水石外邈邈隔憂喜貴賤甯有終早歸
復能幾應知逐推移去此方脫屣霜清洞庭木秋映東
臺几誰患招隱難涂窮儻來止

龍渡峰體連騎田秀冠桂陽秋日登游率然有作

涼風吹曾阜碧草蓋秋山陂陀引松桂阡徑轉巖泉雲
行入冥靄杖策遂攀緣重嶠傳楚牒鳥路度騎田靈羸
靜湫穴文豹隱霧巒修阪秀孤石百代闕彫鐫從來選
勝客自取經過便諒非聖仙迹荒外莫與傳矧茲作阻
鎮起伏傲中原虞秦事俄頃岸谷了未遷此山天地內
斯游在其間圖經豈爲壽曠寄聊可宣歸涂載餘興晚
色霽平煙不辭巾屨溼但惜塵騎喧飄颻神猶王澄寂
物愈鮮寄言賞心侶知余闢榛菅

花園堡秋望作

心閒易成悲避愁轉畏靜野陰風嫋嫋卉木盡秋景清
行引高興覽物自淒警川巖實無情獨秀人外境古今
無間運泉石遂孤冷余懷耦耜袖時過豈重省昨來橫
橋戰艱危遇凶獷清波無久喧斜日淡已炯涼空方蕭
蕭因感謝桃梗

秋雨後夜起作寄龍高平

涼雨驚桂枝吹花灑階闥城南夜窗人惟君獨天末別
情宛如新擘鏡忽華髮長謠獨清醒何以慰契闊從政
予旣勞學道余已末仕隱同此心忉怛送日月清秋夜
初永因寢度林樾故山猶可耕庶來共饑渴

桂陽別詩奉酬黃學正洪熙贈餞之作兼呈州中人士
帳飲諸君子

南皮樂夏宴梁苑美冬游文歌徒暫聚離思方悠悠
余惜久客水石恣淹留友仁既有訓鄰德信多逌薄
植省逢幸羣書慚獨紬耆英傳鑿齒山水記湘州
束馬都龐嶠擷秀桂華樓提鉛朝復莫編韋春及秋
梁孟固同庶荀陳仍接輶補袍攜庾妾挹襲召浮
北池荷屢榮落殺竹始褻修本無枚生速終愧侯
芭求縣金櫟陽市論價三都紙獻貲干伯樂負卷
投知己知音卽賞音邂逅盡同心俄看對明燭早
恨分離襟新情忽如舊懷衰自

然深高張城東館重宴壽龍陰霜肥十月荇魚漑西歸
驚列朋誼罽禁清歌動越吟戟門招狗盜都尉進羊斟
但愁街鼓動無妨落徑侵一朝酒人散翻聞昭氏琴琴
弣出雅詠朗朗兼金映送余飛鴻目賴子清風贈葭莢
夜蕭瑟秋濤曉作灘鳧舟暗相引雁陂雨初還平陽舊
津戍印石遠峰巒浮家不辭役距陸轉勞看乍作眼前
別真成對面難知君學舍冷相思蕙草殘周交杖時過
陳公棋對彈訪道金華客聞簫緱氏山曹司謔京國李
老厭衣冠二何竹林彥沈飲金尊寬曹生建安骨秀發
青琅玕龍潭鼓角靜鹿峰弣誦嫺夏游尙時續窮年亦

自歡促邴豈云異余懷誠未殫鍾湘夢可越蘭執長無
絕晴開桂領雲霧合衡陽雪梅煖香如耐松寒翠如髮
松寒水閣虛車馬日應疏簾釘留粉絮塵窗走蝨魚莫
忘前夕酒甯題異代居東岡一臨望平路長縈紆飛甍
動丹碧平水靜菰蒲歷歷郊籩樹重重岨嶂區應憐來
客簡猶驚冬序除報瓊酬往訊裁素笄來書
自龍江渡綠水至煙彭菴乘舟莫還

杳靄尋洲嶼春心愛此時物華爭綺麗空望轉遙暗
谷分花豔孤巒倚樹危幽篁采芳杜誰見從文狸

是日登山

見青狸不
避人也

石門無數曲青嶂碧流間迴互仍相引空明見一彎輕
舟漾落日芳草上春山坐惜餘花晚終憐幽意閒

水荳生田隴畔湘衡俗以和稷爲糲清明節物也余家
每從上冢采歸供饋食加遵今歲祠祭妻妾自出田
間采之感憶爲詩

淑氣回青甸傾筐采綠茸年年傍北隴惻惻憶兒童晴
雨新春色流傳舊土風粉資叨薦廟還與澗蘋同

春雨

皋蘭漸平路叢棘秀芳椒春華旣靡曼和雨咸慘懽新
歡不暇賞開軒眺曾霄連嶂浮翠靄平池被川濤漾漾

夕陰動娟娟新綠高飛燕弄柔風鳴雉喜初苗遠游久
息駕卽景良多招適人固非適調度欣方調理隨物情
豫契與芳時要谷音豈遽響原本念無遙

登前山

鳴鳩告農始鷓鴣催春華攄情託高望山原盡紆斜環
流了縈帶靜浪涵平沙枌榆新舊廬哇隴畫參差芊芊
高下碧藹藹晴煙花顧彼隆冬柏黯黯寒谿涯霜春忽
改觀蕭城豈足夸違眾非至美榮荅及時敷妍賞有移
易貞脆理不遐目存代謝迹心吝良辰賒服成且風詠
游逸期巾車

山中子規

亦知無別恨每欲喚愁生
怨入庭花暗聲催嶺月明幽
篁春窈窕山鬼夜淒清
試作連宵聽東風萬里情

詠庭中襍花

芳樹最先春娟花猶似雪
暖色夜如空新情朝不歇
玉顏嬌自許明豔簪雲髮
白桃花

何處曉妝來醒紅點玉顙
柔枝通體媚輕花并日開
春風早吹起蠶蝶莫相媒
海棠

朱粉自襪敷枝葉較粗疏
陵冬看故縈隨春明玉除將
持比芍藥應惜皺芙渠
山茶花

一種曰芙蓉皺

六尺珊瑚樹千枝赤玉鐙相看風日麗誰念別離增行
人自躑躅非聽子規聲紅躑躅

夜月明如玉空山不辨花雲來一庭暗風去百枝斜恨
君嘔淚在不遣照窗沙白杜鵑花

春風

遠水接雲昏風沙暗送春日遲驄馬倦花落小園貧秀
野濛濛白荒塍歷歷新飛埃來不近愁是庾公塵
燕子歸何處高軒空自吟黃塵三月莫宮柳十年陰荆
棘花長好桑麻綠已深遙知玉橋側午漏散朝簪
長沙贈別李申夫兼呈同集諸公

詩集卷七

十四

諸公衮衮持節旄翩然脫手如鴻毛湘城搖搖樹矛戟
翠柳絲花矜是日院司閉門街吏喧文酒招要競游集
吾兄心靜身跌踢有時白眼看侯王玉池山人夢金闕
再入京國同趨蹌爾來風塵滿江介百年富貴浮雲外
正逢手詔徵賢良不惜高官盡除拜鳴騶躍馬東南馳
十載再見澄清期紅旌大旆光纓綬余亦高臥衡山垂
長沙五月湘雨寒一夜浮舟從急瀾幅巾握手慢相見
知君昨日初罷官同時流輩殊顯晦且言還往無冠蓋
高吟合沓聲動天沈醉縱橫酒如海賈誼宅邊心遠樓
酒酣正見平湘流蒼然平楚銷人憂江湖浩蕩連歸舟

就中李鄧早相識豈憶祁門坐愁疾人生得意須盡歡
莫遣他時憶今日新知樂盡悲生離留君且駐君不辭
篋中自有秦嘉鏡城裏爭傳京兆眉錦筵紅燭奪明月
清風十日吹蘭雪眾賓皆醉誰獨醒金尊到盡天冥冥
我來較晚非晚遇苦辛且得申長句自從閉戶春山空
無復悲歌燕市中新人顯達故人隱去日怱怱來日同
門前稻孰請歸釀相思但寄西飛鴻

前林遇雨

江南秋色佳出門盡青山高軒三日雨始見楓林丹薄
游不期遠攬秀上平原東峰暮雲合飛瀑過我前齋閣

言集卷一
靜蕭蕭欲往迷蒼煙松桂橫來徑陰森自相連行止貴
吾意誰能待北樊荷裳冒雲溼葛屨踐寒還牧人何笠
望穉子出林誼快游非屯蹇坦道信所便寄言永懷客
車輻徒罷煩

得王饒州必達書寄酬一首

伯緒矜早貴元長恨宦遲高才屈世寵豈是榮台司伊
人裕遠圖十載滯一麾稱多未爲拙反蹇亦有宜振策
華京道嗣音空谷期要津眾所習三徑子所思娛園竹
未歇陳亭執始滋離容簪組下高詠自委蛇異趣固同
適室遠匪道睽儻憶濠魚樂無慙逢惠施

湘鄉西南童梁山居荒崇之隅族岡巒之秀咸豐八年
余與羅伯宜訪曾滌生於山南始識李雨蒼於曾坐
上今歲赴左孟辛喪重過其地則伯宜已死黃平曾
李遠在燕薊山路有蕩雲物逾美感離念逝重以哀
左之切輒於馬上作詩二篇寫其悽愴云余

昔年揮駕馬沙磧困虺隤今來策逸足緩轡吟崔嵬險
因征徒盡山爲達人開青松旣茂悅磴道無迴修蛇
緣風霄曠望出埏垓東西千疊峰蒼白聚雲埵寒光動
人心黛色盡飛來阪竹鬱冬秀巒草及霜荻貞心不期
申脆質懼終腓豈云感時序眷言惜同懷

新知良易歡舊愛信難終匪不服古節賢智不相容伊
余習風誼俊彥亦雲從泊金豈徒踊干莫難爲鋒功成
未易居名高世所恫崢嶸十二載存亡各怱怱浮雲東
北驅毒嶂西南霽余本腹背羽江海所樊籠出美泉石
游入契琴歌悰因是得樞始好樂豈疏慵極知化終理
善生不蘄窮藏壑竟誰昧控地聊相從寄言卒歲游忘
天入鴻濛

春分日和龍高平秋日縣居詩仿姚合體

種秫眞成計何如乞食時卑官間自惜循政久應疲縣
小賓僚暇秋清木石奇夜燈遙在眼寂嘆最相思

見說當官健終聞入世疏
簾授文布政狂妒沈尙書
陶令署頻折元龍氣未除
誰知田舍裏猶自有長沮
湖南使文格道過曲沃以故事責其供帳明旦已發而縣吏叱止文車搜索箱篋文當告人焉沈尙書桂芬巡撫山西亦有微言故第二聯云

至德聊應世奇材只自亡
便令飛海水誰遣下藜牀
宗膾元蓬艾喬松有棟梁
辟人知有道孔老未相妨
廿年有李伯元黃子春左孟星嚴受甫並天下奇士天枉者交友

工拙自爲計琴書世不爭
驛人知隱處識記伏詩名
壯學猶養晚幽居早達生
藥苗朝夕長微有惜春情

莫放春間去何時酒共開
柳宜通體看桃愛折枝來水

閣波頻漲官庭樹幾栽將詩誇小吏賸到接離回

葺宇常招客書牋試遣兒奉深三考過量淺一杯宜訟
簡農須課心忙病可醫饒君增勝事終是在天涯

無意看除目俄知寵辱深想游天地內難遣利名心移
疾憐知印除煩試解簪史官傳止足早悔素絲吟

自識春難久頻憐家在茲燕銜窠裏絮鴈竊夜中脂減
價官輸米征蠻帥弈棋從君斗城內十載樹旌旗

十日城中雨陂唐一夜蛙柳如新解帶蠶似舊分衙逐
路晴光散依田土屋斜桃源非世外祇隔一重花

夜久風敲戶詩成月到樓茶香憶龍井花影拂暉裘塵

世山邊是歸心望裏休豈能眞寢覺閒詠作閒愁

擬室思詩一篇代六雲

朝雨周四除空房寂無端言別未永久榮華始欲蕃期
近思逾促戚戚不暫寬沈陰蔽所望將食廢晨餐庭戶
無彷彿何時照光顏

其一

青青園桑枝熠熠飛蛾翼出門

日有程思君復至夕良緣百年中飄若空中畫恩私良
已周佳期何由積恩來不自保倂倂自苑悒

其二

衝風入

屏帷颺颺攪余思思心不皇寧屣履其何之昔分永睽
絕今爲五日期自君之出矣芳草成華滋思君如春水
瀟漫誰能持

其三

牀鐙景復光夜短何時明愴然思君子

訴我故時情華枕猶在御獨寐長悠悠闔門下重關但

見奔電流自無翻飛願息意還衾裯

其四

晨興臨明鏡見

我昔歡恣人離還復親冀與我君會從來向七載誠願

忽不遂賤軀恃鴻恩豈覺已讐害自顧菲陋姿非君孰

覆蓋

其五

無親欲何依茕茕想念之不傷年時晚懼爲中

道遺進退禮有恆高誼君所知雖慙金玉質承眄既有

時君子念簪履儻來終惠慈

其六

春懷詩四十八首

重陰合四野屣履西榮間長池汎積雨飛花自飄翻春
榮不遺物覽秀還欣然嚴駕將何之幽涂迴且艱遙思

盈庭戶長歎激櫺軒

晨露下青林餘寒襲紈素晴鳥喜煙開朝光謫余戶春
氣洽已久霜霰焉足懼喬松獨知時稊柳欣所遇榮華
在當年觀者豈能悟

黃鵠下建章本自海上來風塵污靈池六翮胡爲哉君
子悅近翫小人識其災自無百尺桐神鳳獨裴回搶搶
枌榆下燕雀終何猜

平生輕薄游韓董願同輿馳道交六轡行人僵路衢出
下承明鑰入乘果園車鳴鐘未及晨促漏盡須臾嗟彼
瑣此兒豈足填溝渠得時偶披昌失路俄朽枯榮寵夏

言集卷一
可惜樂極將何如

猛虎禁山藜吳公若敵國平時雖委它臨機在不惑妖
童矯輶傳扈扈河沛側豈無威重臣閉閣恒避客誰謂
仁者勇雖容付郵驛陳尸九衢旁未假一夫力至今悚
東望心悸田子色淮南憚汲生弘也如振鐸歷下猶可
游飯牛東門石

王子未弱冠安步登台衡康妃謬相疑侍御盡回驚間
平不輔政風采傾二京誰知艱危際再起鎮物情滿盈
不皇息常願居高明人生寵辱涂趨避亦營營不如恣
游宴逍遙可長生

連道有奇士騷耳服牛車志欲千里游任重苦相加局
促長轅下盍見白日斜覆轍相追尋嘉此獨負荷恒恐
馬力盡東野忽蹉跎北風起燕代慷慨長咨嗟

嘉謨竟何施發言已盈庭自非安危計磬折何所爭高
談出四海願一道款誠薦賢在一鶚眾鳥徒飛鳴愧茲
腹背羽野立空屏營

青楓明江水芳澤雲容容佳人翳修裊然悠思無棕東
風飄靈雨千里望相逢恩深怨苦長願欲訴離蹤悅懌
婉變姿揮手陵九重信美已驕傲豈謂莫我從

浮游惜日短采采振衣服雖微達化權媚此好容色竭

羌獨何爲薄莫不皇息蘇丸長孫子卑陋永相襲生理
有萬端去矣各努力

夸名徇權利昔聞順與彰出入移天憲公卿臆鴈行指
顧成光景縱橫賕賂場牧守空候門魚睨上高堂柰何
當塗客斗酒博伊涼三公接計吏豈不愧承筐咄咄市
道交委曲愁我腸

昔余游西山北望太行顛春風動廣漠蔓草與天連蕭
索彌百里烈火不能燔茸茸無荆棘何況芝與蘭狐鼠
走索羣薄莫鳴辛酸誰使茲路塞慨然吟下泉

華懷翼廣夏岳牧奠方州偉哉廿三土環海鎮橫流山

澤殊高下驚驥不同軌一朝虎賁卒脫劍垂九旂紛紛
進退間升降信雲浮常恨白日短光寵不久留豈能回
明照秉燭夜行游

旭日出東極升中始揚光初月潛太陰亦用慰瞻望晦
明有常理非我獨旁皇旣無偃息分實願照扶桑色聲
信娛人況瀆杳冥翔

七聖迷襄城四子窅汾曲由來道不同釋位喪所欲至
人亦撓靈無爲患拘束搏幣接史魚三妻自同浴

九州吾所經誰能更遠游謁來海外客駕言到林北昔
聞殷王子高節邈莫儔率履旣不越截海同安流矚然

日月光東出照燕幽無資豈能國單于笑千秋自恨處
卑濁欲往無輕舟雖微避地哲跂子消我憂

高樓冠丹霞朗然望八荒樓前咫尺地蓬蒿如我長去
此若俄頃誰知歷九霜東鄰走狐兔西邸吹笙簧愚者
苦惜費達人信無方經營百年中但言樂未央得失非
自我何爲愁我腸

京華游冶子本爲繇華觀九州已康娛何惜一旦歡戚
里相招要第宅自交連明后被綈弋娛童曳偏緣快意
耳目內時逝忽如弭中山獨何感聞樂涕潺湲

今日惟元已青陽將欲移寒風翳碧樹宿雨霑路歧豈

惟游宴情歲序忽以馳良辰不我歡和煦獨何施來者
余不羨逝者余不疑但惜終倉卒空負一歲期

平旦登青北壘墓與墳青草被岡隴寂寞送千春年
年臨窀穸此路行復親甯知人與世排突猶一晨思欲
置妻子偃臥松柏鄰驚風暗白日還駕增酸辛

昔年十四五文翰頗翩翩馳騁劉郭儔衿佩相拘連揖
讓未云畢圭組何紛然被褐上蒲輪高議動華軒文儒
廢時務將處木鴈間有名斯有辱物我難周旋焉見無
名人厭世上登仙

達生願長年長年絕人事一去同不還孰謂死生異黃

詩集卷七

鵠呼子安振翼陵九澁服隕霜露精饑渴非我意吾黨
有李嚴紅顏玩塵世荆棘蔽山岡黃鳥飛復逝眾人徒
百哀不以喻明智

空堂曠悠悠寥窅臨四野悲來欲誰訴翔步觀廣夏饑
鳥旦啾啾求羣不皇舍置罔掩八紘本不顧微者懷抱
會有在棄尔蓬蒿下

昔我游江漢高枕黃鵠磯洪波汨汨南北晝夜馳開
襟建雄藩形勢接海維是時金鼓喧揚豫沸如糜長風
振陰埃驚蓬挾地飛貞臣厲偉畧奇智奮孤危孤危昔
已奮今來坐陵遲自非扶桑樹西日誰能揮

天地運有窮河流夜不息包絡華夷間湯湯亘南北奔
湍忽徙流徐冀俄已盡誰能遵此涂帶甲橫四極桑榆
日已西眇然望碣石

飛塵鳴長轂所見皆王侯借問冠蓋下飄飄盡浮游青
軒植桃李本不期三秋春燕懷客心薨棟豈淹留俱同
百年壽垂涕復何求

夙駕河漳濱南向望衛城淇竹有餘蔭康公壠已平軒
鶴歆梁肉石甯不從征繡衣空委佗傅姆泣宵行木瓜
徒區區乃欲報瑤瓊峙嶠楚北外亦復愧無成

黃華造高臺娛女眠清夜巾裏懷芬香裴回步宣榭朱

言集卷一
顏不常榮倏忽嚴霜下樂極傷人情悲來不能舍

朝登齊夷城慨然閱童昏豈忘燕婉好恍惚棄所親二
三實無終珠玉瀆明神單帷蔽初旭高闕集冥塵鼓鐘
朝復莫詎識我惠屯歡游復幾時幽夜不再晨鴈鳩鳴
榛棘可用謝遠人

惡木不可棲鸞鷟宿射干好醜同一致日莫且盤桓至
人無利害物論豈足言長飈舉六翮了然見方圓心悲
吐奇響千里一來還

橫術有拙農荷鍤耘千畝貪名未能已志欲連岡阜春
膏迨良辰耕播勢不久傾資不遺力但見生荆莠時晏

速自謀無爲怨鄰耦

殷宗勤鬼方漸石怨皇朝盛衰雖異時天下固同勞傷
彼障厲地空山叫蜩螻驅役禮義民言往爭窟巢且責
置度外修德布綏要苟無鹽鐵論豈悔開哀牢

誰言日再中垣平坐成欺佞子工時變累卵自忘危葵
北驕九侯盛業久已衰猶勞東西畧東馬卑耳陞身死
柏寢內五子卒相夷

南夷交北狄焉能汨華風但畏讒邪子回適實內訌昧
者獨茫茫餘眾逐曠曹杞人好惡疑亦足自詒凶豈有
明達士長戚以圖終

詩集卷七

三

橘柚來牛蝨松柏損蝱毛甘堅豈不夏方類亦所招區
區老禿翁七十欲何要日莫涂復遽豈念車馬勞榮枯
終消散視彼心忉忉

飛雀依庭戶粒米聊自度所損誠亦微營營令人惡太
牢饗爰居九獻曾不顧是非誰能譏各以飲啄故

修修南山竹垂垂北水薇下有行客吟上有翔鸞飛春
風緣芳徑拂拂吹我衣卉木日夜長我心萋以悲晨朝
理清瑟激響赴瑤徽焉見靈瓊樹朱華委路歧

誰爲心所歡悵望臨春風豈云一朝遇良會願有同繇
星暎碧樹霄色正朦朧歸雁西北翔羣呼夜離離自傷

無疇匹日久凋朱容

吾生亦有涯於世亦有因達人信無我孰謂非我人明月隨四游恒星布八垠俱同一氣運成毀徒相徇豕韋挈地母傳說出微塵默默守一隅龍蛇爲我鄰

寂寂清川水沄沄赴巖曲飛鳧濯其波比翼自棲宿葭荇藉陰沈朝光忽如沐行舟泛春流寧暇相隨逐機心自難馴物性多倚伏空聞海上鷗翔集狎異族建德如可游詎與詹尹卜

朝與良友期夕告余不閒豈惟仕隱殊人事信多端桂枝既可結瓊靡勸其餐山中獨淹留未若濯消盤置此

異同事且從性所便詎作浮北子攜手去人間

良驥不服箱驚駘致千里長涂非吾事敗駕當自止悲
鳴早圉間懼爲伯樂恥老聃適流沙仲尼歸闕里皇皇
道終窮怨尤遽能弭

道術分九流儒墨自茲煩末路倦歧涂簫鼓不復喧稷
下無講肆馳騁競空言聖盜一時止斯言諒非謾小儒
驚耳目竈紫炁人間得失何足理將貽輪扁歎

誰謂百年遠萬歲猶一朝續紛不相知稅駕亦何遼鸞
鳩笑鯤鵬小大固同曹當年信娛樂過此誰能要余生
後古人來者豈余招先天未爲老六極未爲高維斗儻

不忒登雲可游敖

樊生願農圃桀溺把鉏耰安見樵牧人高尙勝王侯巢
父避天位計校一何周至人無寵辱素位始優游捐金
未忘貧解組未離囚悶然辭應間無取亦無求
於心忽旁皇演漾春氣交冉冉芳節逝蘭芷成新茗自
我長離別今來猶鬱陶芳草若千里瞻望亦已勞鳴鵲
命新儔歸燕識故巢感物長悽惻寤言歌且謠

勺藥懷丹芽不爲觀者妍琬璫寵恩眇風日始相煎榮
枯眾草內豈慕世俗憐佳人縱情好白首誓不捐古來
若無死何以解此歡羅袂招彼美紈扇棄華年有色故

有情諒非心所然

日永愁思長迢迢
賴鳴琴芳花明瑤席
浮雲翳庭陰皋
蘭豈不榮違土難爲心
江匯饒靈宅重華始相尋
南嶽有孤鳳朝陽抗奇音
寄言三青鳥時暇當來臨

湘綺樓詩卷第七

弟子衡陽程達康恭校

湘綺樓詩第八卷

庚午辛未

湘潭王闓運字王父著

夏日寄懷曹郎中燿湘

昭陽鏡萬里薰風度卷阿送懷騁曠望倏忽陵關河佳
人常獨居守一抱清和炎塵合九衢念子罕經過爲郎
非其好解嘲意云何囂囂朝市情善隱猶薜蘿余情偶
淹留匪曰避鳴珂高枕對松石怡顏眄庭柯初蟬惠余
音颯颯涼絺羅同心各所適域內諒不遐道家出史官
國宰應駘它人邇室何遠念茲同詠歌

寄莫五丈友芝

山居易徂歲索處難爲年江東與君別蝕月二七圓久
客便所寓懷歸憚山川沅澧日夜流曠望風霜前雖耽
琴書樂豈勝昔所歡華髮對藜牀緇衣感洛鄜旅遞旣
殊趣風波誰與言常謠影山句枉勒鍾庭煙儻有松桂
興暫來宅湘堧

衡州城西望雨

夕氣清陂唐天容絢林叟陰霞映玄霄金暈相鮮灼殘
陽明遙甸素雨昏叢薄丹赤煊西雲青蒼負南嶽驚茲
驅荷浪涼響通蘿郭霧合望仍空光連象惟漠到影如
可陵超塵視寥廓

盛暑得雨池上景色已復秋情感而有作

閒居願暑徂安知惜長晝涼風開遠懷驚秋覽物候浮
雲何奄忽百感俱陵驟時華競方新人生獨已舊丹薇
叵貪榮垂楊已倦茂遷流有由然睚達明所受趣人常
多悔時過始蒙瞽悠悠誰使之往者不可咎

嘉會篇九年十月於長沙作呈龍李二鄧

嘉會固有常賢聚斯爲慶矧茲二好合欣逢四難并穠
煊擬春晴密雨調霜令歡言翹杯行新晴瘳離病龍李
宅殷憂巷廬已溼漑釋此且微行訪舊驚年負余生信
無涯二紀勞將迎悽悽尙德里落落衡山詠風川無損

時達者超其柄但知來日樂豈憶徂年競
缺月已復弭
德星儻相暎且當數經過終然不伶俜

心遠樓夜飲呈同坐諸公去歲李申夫罷藩使時頻宴
此樓主人朱翁好客多藏酒數招文士集飲十月已
酉劉總兵設技樂餞余余三爵後辭而赴朱遂盡街
鼓踏月而還因述舊游兼調任鶴年黃錫燾楊恩壽
龍溥霖二鄧子

良宴歡相續翻催惜剛心高樓華燭夜歸客白頭吟醒
酒宜寒月傳更襍戍砧相看豪氣在誰信百惠溪
促管背花來秋光滿玉階
蒼騰去年事
棖觸酒人懷舊

月非今月無涯接有涯麓山常在眼登賞幾回佳
少小天眞足追尋興不闌中年歡漸少正賴酒相寬百
里供鮮鱸深秋破蟬團主人能好客看取玉杯乾
犯夜拚街吏行歌識醉人管弭閒月露潭醴語風塵息
國吾何敢離筵豈敢頻傳詩誇蜀使高會每回新

石牛塘途中作五首

余先世卜宅石牛塘近三百歲庚戌經行曾賦長句
至今二十年爲族子所賣先不相告也旣無求田之
志兼少買山之資躋躅門前感懷灌灌

故宅沿明代艱難託子孫石牛空識主駟馬不容門在

轉人先老茗亭屋尙存寒塘休照影青鬢曉霜餘

自雲湖至姜畬方三四十里曠土彌望比年散軍勁
率相結攻剽若度地墾荒數年之間桑麻被野余旣
不假安人之柄鄉人衣錦方奪農功故無足言矣觀
此一隅何患人滿聊存此議冀或行之

曠土彌無際蒼蒼一望中田園民廢業家國道終窮準
擬十年計橫栽百萬松猶憐臥龍客徒作種桑翁

前福建提督王明山少壯不偶乞食吾鄉旣以軍功
起家富貴冠於一時後有郭松齡者以財結交聲望
傾王然眞率不如也古者受成於學而虎賁說劒上

不遑教鄉校猶存今老生貧儒望過王郭若稍能禮
導俾廁衣冠化其麤獷生其畏慕鶚集泮林況於虎
臣乎而或拒或諂正論無聞青青子衿豈不多愧
將軍昔貧賤乞食眾人哀一劍君恩重三年甲第開愧
無芹藻化誰養棟梁材莫恨人才少徒驚富貴來

自立雲市至馬坵昔歲貧婦椎髻鶉衣今少婦童女
盛施朱粉酒壚逆旅不類貧家入湘鄉則妝飾異矣
咸豐中東南盛爲拖後髻曰蘇州罷讀若派蓋服娛也

橋上當壚女雙金繡額圓巧攏蘇罷髻嬌索市門錢舊
日村牢落窮嫠淚泣然餘華非盛事饒亂況頻年

言身卷八
已酉大水荆岳流民渡湖者相望吏民惟務振卹而
已去歲及今水患尤甚巡撫府縣下令格殺饑民然
橫索自如也振災之法治亂異宜今宜於災地重施
無令出境比年兵亂人輕去鄉轉徙之民幸災樂禍
然議殺流民胡可訓也且前者振卹湖南以興背本
吝施非吏之罪矣

水患推庚己重湖賴上游寧知冠蓋里徒有稻梁謀應
客無肥馬還鄉賣種牛老農間論世肉食莫深憂

雨過空靈灘

煙岫濛濛白秋楓瑟瑟青歸帆開霧雨細浪響空靈水

驛雙鬢報灘聲一枕聽霜餽不易得隨處問漁汀

淦田權成示從弟世同

夜火明孤戍荒愁暗裏來饑寒羣盜苦津邏幾時開短
榻深宵雨新霜北嶺梅何須戀升斗終前故山萊

酒集憶甲寅歲潭岳戰事感舊有作贈彭侍郎玉麈

至人不嬰物應物有推移行藏固自我遷流忽在茲江
湘昔崩迫羣材競求施綢繆義軍幙奮迅潭城垂仁兄
總一旅伐鼓振天維重陰豁然解大捷始赫斯誰參督
府謀仍蒙驕將欺謬興靖澗役再僨城陵師自此緜一
紀囂然吳楚疲余蒞終軍策偶作田單師從容視成敗

言集卷八
恩憤論安危八沉洞庭舟久忘沙鷗期寧知錢定臣亦
得浮雖夷波濤識笳鼓林樹疑旌麾裴回風月下昔是
今非非拯溺事由已成功退所宜悶然來去間身外豈
足譏逝川無停舍今古復幾時情深日滔滔迹往空遲
遲消搖值晚節已過誰能悲

青草湖曲

湖草最先春芳心自千里汀洲偶然望客恨連天水平
生不省江南怨柳眠花飛春始見誰知露葉煙絲中一
水一隄情萬重平波隱隱迷空曲極浦萋萋隨雨風湖
光草色春相引扁舟暗覺東風近行人來去莫相思天

涯易盡愁難盡

小冷峽

平隄疏柳晴初綠輕舟挂楫驚鳬浴津吏馮闌意思閒
茶稅未登鹽課縮澄江百里作雙回官舫鳴鉦早晚來
莫向芳洲尋杜若年年水退草空肥

早春漢陽曉望作

雄襟建三城曠勢迤千里沔江波始春方舟道如砥水
氣濛濛晴昏昏愈清綺真秀不可圖芳暖非蘭芷懷人
惜道窮媮安論霸始鵠磯旣崇胡鸚洲義酬李貞臣經
緯謀今日山川美鬱然層樓觀無詒仲宣恥

正陽縣道中作一首縣令張君勅立試堂

北風振邊塵本來自朔方雖無動地力翳此白日光征夫務前涂息處未敢皇經行感遺壘昔遘淮汝荒兵勢重燕楚精甲連荆揚誰能鎮中原羣寇起雖張台藩旣傾覆兩相復鴈行豈云多算勝竟賊凶徒僵慄夫一按劒如柯反汶陽存亡固有時強弱信無常至今多壘郊京觀鬱芒芒西夷近馮陵天際闕黃屋公卿但寄坐寧念臣慙辱樂亡豈人情有智苦不足思欲叩明后庖人代尸祝悲憤立廟堂從容奠川瀆勝成文王師敗比汲水曲家墉旣可乘否桑信貞卜翩翩柳垂枝天天桃始

榮低昂塵沙際亦足慰我情汝南昔多士北隴已久平
伊川尙爲戎陳蔡不再興麥苗何漸漸舊業輟農耕良
令敷儒術講舍始觀成願言推政本聊以惠遺氓慨彼
漆室歎挽輅重屏營

重過邯鄲作歌寄六雲

并序

同治三載余自清苑南還感臨洺之荒寂念故國之
餘春眷彼舊游嗟余道長時新得六雲彌月而別以
其幼質尤畏長途偶作歌詞有玉顏嬌曉之戲然自
此游倦閉門七年知好斷斷譏余憚出辛未正月強
一北征時則節候早春七星逾次平沙芳草有同昔

時而兵寇之餘焚蕩尤苦方台王曾李毛左諸帥之
敗也余居山中微聞燕趙有事而已至於梅榮桃落
槐陰楓曉樵蘇始倦詩酒方閒未嘗不率意同軒但
歌送琰流賞風月之前指畫山川之外當斯時也殊
不知榮辱何因而生哀樂何從而見況乎他人之成
敗一時之勝負乎夫出處一也而情不勝境未能忘
情其惟擇境乎堯喪天下於汾水之陽孔子乘桴於
九夷之海聖人有時而辟世顏子何爲而醫國哉旣
睹紛爭自然馳驚非夫道力殆難自止但歲月如流
修短同逝靜者觀化躁者忘年余與諸公閱世一也

昔曜桃李之色今改蟪蛄之年豈獨玉容悲其老醜
而僕僕以徇時論殷殷以務修名不亦過乎感而作
詩固非小女子之所知也

君不見昔日漢宗置酒論恒趙愼姬清瑟聲要眇壯心
苦憶年少時馮闌自指邯鄲道慷慨悲歌泣數行人生
哀樂信難忘魏公英姿定河朔鄴城餘恨惜分香兩君
得意尙如此何況叢臺兵火荒舊游飛沙沒車軌七年
閉門風日美閨中偶論清苑游有寤不渡漳洺水羞言
十九處錐囊愁見三千曳珠履鼓角歌鐘兩寂寥門前
五柳春風裏歸雲無心仍獨飛黃塵有意污人衣積牆

言身卷八
敗壘悽滿目榆莢棠梨春影稀朝市興亡如轉轂忙者
自諠聞自寂惟應歲月同遷流玉顏暗老蛾眉蹙畫閣
鳴箏久集塵澠池擊缶任旁人徒憐趙女如花兒一閉
阿房十一春

贈翰林周學士壽昌

長沙學士才名羨澄湘臺下初相見當時鼓角翻江波
取別慇懃若飛電七年臥病黃鵠磯卽君留滯周南時
漢口霜鳬凍衡罔有酒相呼斟酌之我年未壯君已艾
眾中許我傾流輩鸚鵡洲前狂笑來禰衡驚起仍相怪
古來盛名多零丁看君早入承明庭浮雲富貴長過眼

三台跂足如蓬瀛。蓄余抱玉求高價。白須趨走都堂下。
人生得失苦相欺。與君同被時人嗤。一回相逢一回老。
惟有詩恩如嬰兒。郭侯知君復知我。酒邊論君每移坐。
爲言年少妒風流。高堂挾瑟雙僂髻。卽今老去看文君。
絲竹餘音不忍聞。頗憶東山謝安石。遠愁西第沈休文。
南窪明月清光絕。古往今來圓又缺。且應擊缶對高吟。
莫遣當窗照華髮。彰門曉樹映宮樓。冠蓋憧憧車馬流。
持戟同僚揖王董。登車新雨論黃周。元亭寂寞秋苔綠。
季主逡巡不能卜。西風落葉閉重門。悄然坐夢深巖屋。
余亦長歌歸故關。白雲幽澗水潺潺。它年乘興一相見。

分作淮南大小山

感興贈謝麀伯

麀伯居翰林性和易多親而好息時與曹燿湘張祖
同友善二子既出都暇或過余因感贈之

恒風無休時
息心怨朝陽
離披小麥空
蕭散春葦長
賢臣懷膏澤
息時步旁皇
曰余泉石人
盍此共枯荒
既來觀
憔悴重戶避
炎光
泠然君子聲
披襟贈風涼
莊生有道樞
旱浸已無傷
胡然願泥中
歸與斥鴳鴉
幸能樂蓬艾
內外各依方
君留九門下
未異江池旁
瞽張去駸駸
豈不勞輟行
所怨尊酒會
終然絕高張
燕歌煩我心
雅

詠儻賡颺

九夏詞

豔情之詠夏景難工齊梁所傳簡文納涼一篇而已
子夜四時體小而俗聊以長日擬爲九篇

玉階風過朱成碧單羅映作輕雲色重衣隱膚初避人
那識餘香先度君

窗簾早涼調新燕晨妝手輕雲髮卷臉紅初潤不施朱
當軒發色勝芙蓉

洞房四角通光影屏帷風輕羅袂靜碧紗帳薄裁隔煙
語郎長日不勝眠

槐陰窈起新蟬語映簾斜日如初曙玉紋越簟融粉光
誰能輕薄學曉妝

中庭月地明如雪雲鬢冷處流螢滑玉簟端然一尺腰
可憐無計度涼宵

井華煎香供新浴粉汗輕紅涼一沃玉體凝脂羞自看
感郎帳底不嬌難

珠蘭瑟瑟香如蜜清泉朝露勞相惜帳中微煖一夜開
不應取冷入君懷

冰紈避午深深過翠刀破瓜涼滿坐寒香散衣生綃輕
頰顏拭粉玉釵橫

風荷急雨驚香斷
循闌卷簾看玉腕
畫長無事最相饒
不須隨例愛涼宵

五月朔日潘伯寅侍郎南房下直同張香濤編修招陪
耆彥十六人宴集龍樹寺酒罷賦贈潘張各一篇張
新從湖北提學滿歸故有良使之稱

西京重愔誨六藝賴昌宏豈惟羣廉孝兼得翼承明華
選今在茲大雅竟誰名達人獨許謨敷席禮奇英元辰
耦休暇勝集燿西城高軒靜風埃夏雨宿餘清談酣時
間作賞樂旣云并嘉魚昔何美萃鹿貴款誠曰余久鄰
德無德廁周行羣賢實元凱濟濟作皇楨苞稂豈終嘒

言集卷八
行葦澤無贏得人斯維競企子陟台衡西園徒文宴愧
茲冠蓋情

良使閎儒宗流風被湖介眾鱗歸雲龍潛蚪感清唳拊
翼天衢旁嘉期耦相對陸荀無凡言襟契存傾蓋優賢
意無終依仁得所愛招要宏達羣變彼城隅會從來京
洛游俊彥相推邁流飈逐殞波倏忽陵往輩終賈無久
名音恭豈專貴飛蓬偶裴回清尊發幽噫金門隱遯棲
魏闕江海外聚散徒一時弭望旋相代君其拔秦茅人
馬遠唐棣無日四難并彈冠俟林瀨
陳吉士理泰斯入翰林述其所職贈之

評決倚博士討修在史編經術昔爲貴長才今見妍吹
竽易爲良舉籍遂多湮邇來禁近臣翻列冗從班猶然
守資格判步台司前

成皇重文儒內職倚旬宣吏兵困所學他涂稍騰遷臺
省稀攤旄卿寺實停年官也以人重人輕豈在官維君
起經生一舉遂雲搏趨蹌盡時髦文學見山淵從來將
相階養望固超然豈伊記載職旅進作鵷鵠誦詩雖已
多議禮莫知原尙閎漢延誼庶以六執先無曰仕爲學
簪紳非我賢

福建按察芝岑司使葆亨久宦湘中今以入覲相見南

言集卷八
窪寓館卽司使廿八年前習經之地感舊悲時率然
有作

喜氣龍樓曉恩光豸繡新軍容依仗靜

天語隔簾春鄉國今如客圓明昔望塵九遷非幸寵真
作老邊臣

虎穴探牂舁駝裝費轉輸婁聞按粟尉親問牧羊奴大
體仍長算三郊有時甥此行光照乘何用海南珠

十丈甘棠樹長沙似故鄉別愁蘭芷地新譜荔枝香兵
驛歸廉使澄清寄海疆沅湘近飛檄無計覓循良

南望太平館公子讀書臺林樹從新長軒窗儼舊開不

辭年荏苒且其月裴回惟有階前石應知聽履來
食瓜有作寄寢緹

河朔留佳蔓京華破碧瓢寒消三日酒味省十年香玉
手曾團雪龍須怨已涼無因憑驛使一爲款漁莊
五色同甘脆包苴壓李桃剖香初滿席畫水不勝刀風
入疏簾靜星縣銀漢高生綃逗芳澤拭粉莫辭勞
蟬鳴清晝遲消夏輒相思黠贛間曾品蒸湘恨不宜餐
霞堪送老種玉恐無師卻笑蠻荒長炎天貢荔枝
灌園終有願消渴苦難勝客裏逃三伏歸與守一塍風
沙感西域煙露滿東陵此物能忘暑青蠅莫語冰

圓明園詞

宜春苑中螢火飛建章長樂柳十圍離宮從來奉游豫
皇居耶復在郊圻舊池澄綠流燕薊洗馬高粱游牧地
北藩本鎮故元都西山自擁興王氣九衢塵起暗連天
辰極星移北斗邊溝洫填汙成斥鹵宮廷暎帶颺泉原
渟泓稍見丹棱汾陂陀先起暘春園暢春風光秀南苑
蜺旌鳳蓋長游宴地靈不惜讐山湖天題更剏圓明殿
圓明始賜在潛龍因回邸第作郊宮十八籬門隨曲澗
七楹正殿倚喬松軒堂四十皆依水山石參差盡亞風
甘泉避暑因留蹕長楊扈從且弢弓 純皇續業當全

盛江海無波待游幸行所留連賞四園畫師寫放開雙
境誰道江南風景佳移天縮地在君懷當時只擬成靈
囿小費何曾數露臺殷勤毋佚箴驕念豈意元皇失恭
儉秋獮俄聞罷木蘭娛氛暗已傳離坎吏治陵遲民困
痛長鯨跋浪海波枯始驚計吏憂財賦欲賣行宮助轉
輸沈吟五十年前事厝火薪邊然已至揭竿敢欲犯阿
房採丸早見誅文吏此時先帝見憂危詔選三臣出
視師宣室無人侍前席郊壇有恨哭遺黎年年輦路看
春艸處處傷心對花鳥玉女投壺强笑歌金杯擲酒連
昏曉四時景物愛郊居玄冬入內望春初嬾嬾四春隨

鳳輦沈沈五夜遞銅魚內裝璜學崔家髻諷諫頻除姜
后珥玉路旋悲車轂鳴金鑾莫問殘鐙事鼎湖弓劒恨
空還郊壘風煙一炬間玉泉悲咽昆明塞惟有銅犀守
荊棘青芝岫裏狐夜嘯繡漪橋下魚空泣何人老監福
園門曾綴朝班奉至尊昔日喧闐厭朝貴於今寂寞喜
游人游人朝貴殊喧寂偶來無復金閨客賢良門閉有
殘瓢光明殿燬尋積壁文宗新構清輝堂爲近前湖
納曉光妖嬈林神辭二品佛城舍衛散諸方湖中蒲稗
依依長階前蒿艾蕭蕭響枯樹重抽盜作薪游鱗暫躍
驚逢網別有開雲鏤月臺太平三聖昔同來甯知亂

竹侵落出不見春花泣露開平湖西去軒亭在題壁銀
鉤連到籬金梯步步度蓮花綠窗處處留羸鑿當時倉
卒動鈴駝守宮上直餘嬪娥蘆笳短吹隨秋月豆粥長
飢望熱河上東門開胡雛過正有王公班道左敵兵未
熱雍門荻牧童已見驪山火應憐蓬島一孤臣欲持高
絮比靈均丞相避兵生取節徒人拒寇死當門卽今福
海冤如海誰信神洲尙有神百年成毀何怱促四海荒
殘如在目丹城紫禁猶可歸豈聞江燕巢林木廢宇傾
基君好看艱危始識中興難已懲御史言修復休遣中
官織錦紈錦紈枉竭江南賦鴛文龍爪新還故總饒結

綵大宮門何如舊日西湖路西湖地薄比郇瑕武清暫
住已傾家惟應魚稻資民利莫教鶯柳鬥宮花詞臣詎
解論都賦挽輅難移幸雒車相如徒有上林頌不遇良
時空自嗟

南洼高閣感秋

莫雨度太行西風吹薊縣桂樹未皇榮蘭華忽已晏陰
雲僚櫺端淒氛掩京甸悠悠咫尺間佳人不我見巾車
久徘徊行舟日遙衍誰謂情可通千言不如面

七夕周學士宅餞集

雲聚感天衢星離怨河曲念別霄始清聯鑣宴宜促澄

陰綠槐市張飲藤花屋良節動秋吟深情駐行轂是夕
最妍涼遙思屢還復佳人望何遼歲會歡已數昔傷靈
匹睽今悟嘉期續乖違豈仙然間關念子獨漏轉酒未
闌塵清雨猶宿涼焮媚曲舫輕軒背明燭留連如可思
貽君憶川陸

董二兵備同年兄文渙餞集龍樹寺溫編修忠翰作兼
葭送別圖張岳州德容周學士壽昌徐侍郎樹銘張
編修之洞及主人皆有賦贈輒成長句贈董兼別諸
公

憶昔醉眠海淀廬曉聞春鷺相命呼牡丹香穠晉陽館

造門不問主有無室中少年最風雅長眉修皙照坐隅
我時未壯心尙孩欲學揖讓忘踰趨褐衣偃仰睨朝貴
高談健啖頗自如驪駒在門青春莫長揖金臺屢回顧
空山花落十二秋車轍重尋九衢路故人已老新人稀
就中潘張各相知清朝廣宴龍樹寺豪雋滿眼行委蛇
董侯酒半軒然來席前欲語心然疑長身玉立頗有頰
令我卻憶初見時爲我馮闌語湖曲忽如乍別情相追
南注雨晴春水足蒹葭影作當年綠西風一夜闐闐涼
枝葉蒼蒼在君目人生老大不自知與君苦惜歡會遲
軒窗似昔風月舊安知林樹非前枝今看榮落眼前異

始悟華髮衣塵緇當時朱顏騁英妙亦如百艸懷春姿
見此使人歸更早涼宵寢入衡山道離觴促宴當盡歡
得與良朋寫懷抱張侯握符君山頭溫張復憶湘漢游
玉堂學士徐與周幾年別思湘春樓蘭茱芳華桂樹老
悄然欲度朱陵幽白露爲霜風落木楚材車載回萬牛
顧我輪囷待時用散樗鳴鴈從人求況君度隴早假節
甘涼轉餉專兵籌卽今朝政勝往歲巖廊不作庚申羞
中興親問待公等高歌痛飲非吾謀十年一見不易別
修名冉冉眞堪愁何時遠贈繞朝策豈令獨敝蘇秦裘
九門月上良夜永相思萬里心悠悠

天津南望水

常歎神州沈堯風今果變碣石久已淪迎河不重衍田
廬逐流潦羸壯空溝畋農功甘鹵莽情氣由征戰積廢
將千年循良豈一縣二京尙難興百姓紛相眩始知戎
馬治不弭冠裳亂方驚海揚塵復此陵作岸禹功豈異
人漢吏宜高選徒然怨英俄懼絕中國綫

秋風詞

萬里游兮天始秋辭帝鄉兮放遠流漕渠北流兮波濤
剛激鴈首兮聲洋洋西風壯兮秋蒼蒼驅浮雲兮奄四
方中川帆兮浩東行拂南皮兮指東光皋之有蘭山有

桂君良游兮余不會佳窈窕兮翳修羅順來風兮吟去
波蛟龍承擢兮君不敢過余將去兮河淮江與子期兮
衡之宮歲既暮兮可相從何爲淹留不我同

張秋河舟望月

游客便江湖河舟始乘興翩然夕風前擊此清秋勝汀
洲漫安流輕煙攤平乘魚山青若雲潭漣月如凌南艫
既津通東行恣翔凭徙流念周衰會穀歌侯應寒露川
梁深飛光別愁凝誰言一輦杭鱗鱗不予媵

南陽湖采菱

湖天中朗然乘流縱虛棹秋雲氣激鮮輕陰愈光照浪

浪驅臥聽皎皎明孤眺空清信無邊逸興翩已到微波
積深青晴漪激寒峭文鱗旣承橈浮藻若可釣偶懷持
竿人因歌采菱調游隱豈異情欣寄從所好煙開微山
秀樹密湖陵奧塵纓久已遺長謠涉江操

淮浦夜飲歌

九月望夜從督府還泊平橋歐陽總兵利見招同劉
淮揚咸袁都轉保慶吳總兵家牘李大名興銳曹郎
中耀湘田副將恩來夜集觀飲甚豪乘興爲歌

纖雲吐月淮浦秋鳴笳吹作清夜游樓船街尾組練靜
岸艸塹鐙其清景上相觀兵戎政閒聯翩劒舄來英賢

時平高會各稱意未飲先論通夕醉三豪一舉三百鍾
欲醉不醉神從容劉侯伉爽賢地主席前飛觥作花舞
主人金罍相爲傾曹生半醒田王醒不酒能醒酒能醉
四坐歡笑風泠泠白露如珠玉盤飴船頭鼉更莫催客
自從吳楚翻江波豈料今日同安和舊游新知樂莫樂
良宴重堅後夜約金山焦山在眼前試持長瓢抗江煙
小孤山

緣江勝地樓閣壯麗皆軍興工力所造

徑欲移危石當門作翠屏金椒未嶄絕雲樹倚空玲
壓江流大寒生日氣青風波太孤冷揮手謝仙靈
百尺曾樓出神功雲構刊年來喧鼓角天遣助江山血

浪看猶涌沙鷗事已閒歸舟何太急祇欲趁風還

莫子偲丈挽詩二十韻

宅土尙有歸斯人不在山游隱雖一致難與俗士言秋
霜未凜冽已見凋芳蘭豈惟失師友西南寶遂殫疇昔
抱遺經中年忽播遷微官不副望竭言從邠原漂搖薄
江介感慨誦縣蠻猶遭何公惑聲實未克騫通人蔽有
時方信招隱難裴回市朝側無求復何干終然死羈旅
曳尾徒空言圖籍有餘富蕭條閉空棺妙迹灌已絕貞
碑誰與刊嗟我懷楮素辛勤洲渚前良游樂未終異問
駭朝傳傳聞已再譌夜壑果俄憇不驗門館寂猶疑斯

語謾浮舟指西邁欲待徒潛焉江流日夜東魂氣豈同
還寄聲寫所恨將子吐煩冤

從大孤入彭蠡望廬山作

輕舟縱巨壑獨載神風高孤行無四鄰窅然喪塵勞晴
日光皎皎廬山不可招揚帆挂浮雲攤楫玩波濤昔人
觀九江舉目送神霄浩蕩開荆揚潏潏聽來潮聖游豈
能從陽島尙巉嶢波靈戲桂旗仙客歎金膏委懷空明
際傲然歌且謠

湘綺樓詩卷第八

弟子衡陽程達康恭校